



26. oktober 2023

UKA23/114

Motorcykelnik ilumut eqquissisoqarsinnaanngussanersoq oqallisissiatut siunnersuut.

(Inatsisartunut Ilaasortaq Bjørk Lange Olsen, Demokraatit)

Siumumiit apeqquteqaat aallaavigalugu oqallissiamik qaqitsisoq, Bjørk Lange Olsen Demokraatineersoq qutsavigumavarput oqallissaarutaanut, Siumumiillu imaattumik oqaaseqarfingissavarput.

Ukiut aqqaneq marluk matuma siornatigut Inatsisartuni aalajangiiffigisassatut siunnersummik qaqitsisoqarneratigut motorcykelnik eqqusseqqusiunnaarnerup atorunnaarsinnejarnissaanik Naalakkersuisut sulissuteqarnissaat qaquinneqarpoq. Tamannali kingornatigut Inatsisartuni ilaasortanit amerlanerussuteqartunit itigartitsissutigineqarluni.

Siumut itigartitsissuteqartunut ilaavoq, tamannalu miserratigisimannngilarput, taamatullu isumaqarneq suli annertunerpaartaatigut attapparput, assigiinngitsutigulli ammatitsilaarsinnaanerput aamma oqaatigerusullutigu.

Sooq itigartitseqataasimanitsinnut aammalu sooq suli ilaatigut taamatut isumaqarneq attanneripput ima tunngavilersorumavarput.

1980-imi motorcykelnik eqqusseqqusiunnaarnerup tunngaviisa ilagaat aqqusinermi mianersugaalliornerit annertuneri, tassa pingaartumik inoqatinut annertuumik ulorianartorsiortsarneq. Siumumit pingaartipparput inuit aqqusinermi toqqisisimasumik ingerlaarsinnaanerat. Nalunngilluinnarpalput motorcykelit pingaartumik inuuusuttunut soqtiginarluinnartuusut, kisianni Siumumi isumaqarpugut motorcykelit nunatsinni illoqarfinni nunaqarfinnilu aqqusinerni naaqisuni naleqqutinngitsuusut.

Ukiut aqqaneq marluk matuma siorna itigartitsinitsinnut atatillugu ilaatigut aamma inuussutissarsiutinut atatillugu naleqquttuunnginnerat tunngavilersuutigaarput, tamannali suli ilumut tunngavilersuutitsialaandersoq Siumumi nalornissutigaarput. Siumumimi isumaqarpugut motorcykeli assigiinngitsunut naleqqussarlugu periarfissiissutigineqarsinnaasoq aamma, ilaatigut assersuutigalugu motocross-inik taaneqartartut nunani allani nunannarineqarlutik atorneqartartut nunatsinni periarfissaalluarsinnaanerat takorloorneqarsinnaammat, ilaatigut immaqa inuussutissarsiuteqartunut aammalu takornariaqarnermik suliaqartunut iluaqutaasinnaasumik.

Nunatsinni illoqarfiit akornanni aqqusinniorsinnaanermik politikkikkut anguniagaqarneq eqqarsaatigalug alloriarfiit siulliit pereerput, suliniutillu taakku piviusunngortinneqariarpata pissutsinut allarluinnarnut aamma pisussaanerput kialluunniit takorloorsinnavaa. Ilaatigummi massakkut Sisimiut Kangerlussuullu akornanni aqqusinniorissaq anguniagaasoq eqqarsaatigalugu soqtigisalinnut assorsuaq pilerinartuusussaasoq aamma takorlooruminarpoq.



Siunnersuuteqartup oqallissaartuteqarnermini ilaatigut motorcykelnik eqqusseqquisiunnaarnerup atorunnaarsinneqarneratigut killilersuutitut piumasaqaatersuutigineqarsinnaasut assigiinngitsut ilanngullugit qaqippai. Taakkua ataasiakkaarlugit isummersorfiginissai Siumumiit ajornakusoortippagut, motorcykelnik eqqusseqquaannginnerup attatiinnarnissaanik toqqammavilersuuteqarnerput pissutigalugu. Taamaattorli tassunga killittoqassappat Siumumi isumaqarpugut killilersuutitut atuutsinneqalersinnaasunik aalajangersagaliornissaq eqqarsaatigalugu innuttaasut angallattullu isumannaatsuunissaannut qulakteerinninnissat pingarnerpaasoq.

Siumumiit taamatut oqaaseqarluta oqallilluartoqarnissaannik uaguttaaq kissaasivugut.

Anders Olsen, Siumut.